



II კვარტალი, 2023

ეკონომიკური ზრდის ტემპის პროგნოზი

მაკროეკონომიკური ანალიზისა და საგადასახადო პოლიტიკის განყოფილება

ელ-ფოსტა: pbo@parliament.ge



პარლამენტის საბიუჯეტო ოფისი, 2023 წ.




პარლამენტის საბიუჯეტო ოფისის შეფასებით, 2023 წლის II კვარტალში რეალური მშპ-ის ზრდის ტემპი დადებითი იქნება და 6.4% დაფიქსირდება. მშპ-ის მოსალოდნელი ზრდა 2023 წლის მეორე კვარტალში განპირობებულია წინა წელს დაწყებული გაუმჯობესებული ეკონომიკური მდგომარეობის შენარჩუნებით. მიუხედავად იმისა, რომ 2022 წლის მეორე კვარტალში ეკონომიკის ზრდის საბაზისო ეფექტი მაღალი იყო (2022 წლის მეორე კვარტალში ეკონომიკა გაიზარდა 7.2%-ით), ეკონომიკური მდგომარეობის გაუმჯობესება კვლავ გრძელდება. უნდა აღინიშნოს, რომ ეკონომიკის ზრდის მაღალი ტემპი შენარჩუნდა 2023 წლის I კვარტალში. კერძოდ, სტატისტიკის ეროვნული სამსახურის წინასწარი მონაცემებით 2023 წლის I კვარტალში საშუალო რეალური ზრდა 7.2%-ით განისაზღვრა, რაც ემთხვევა პარლამენტის საბიუჯეტო ოფისის პირველი კვარტლის პროგნოზს¹.

საბიუჯეტო ოფისის 2023 წლის მეორე კვარტლის ეკონომიკური ზრდის პროგნოზი ემყარება დაშვებებს, რომ 2022 წლის მეორე კვარტალთან შედარებით:

- ტურიზმის მოცულობა დაახლოებით 1.8-ჯერ გაიზრდება (2019 წლის მეორე კვარტლის პანდემიამდელ მაჩვენებელთან შედარებით დაახლოებით 1.2-ჯერ ნაკლები). ამავე დროს გაიზრდება ქვეყნიდან გასული ვიზიტორების რიცხოვნობაც.
- ტურიზმის ექსპორტის მნიშვნელოვან ზრდასთან ერთად კვლავ შენარჩუნდება შიდა ტურიზმის აქტივობა.
- გაიზრდება როგორც კერძო მოხმარების, ისე ინვესტიციების მოცულობა, რაც განაპირობებს მთლიანი მოხმარების და ინვესტიციების ზრდას და ეკონომიკური აქტივობის აღნიშნულ დადებით ტემპს.

■ / ● რეალური მშპ-ის ზრდა (ფაქტი) - პროგნოზის ინტერვალი* ● საქსტატის შეფასება




*პროგნოზის ინტერვალი აღნიშნავს დიაპაზონს, რომელშიც მშპ-ის ზრდის ტემპი იქნება მოცემული. ინტერვალის შეფასება მიღებულია ცენტრალური პროგნოზისა და გასული წლების კვარტალური ეკონომიკური ზრდებიდან ± 0.5 სტანდარტული გადახრის ჯამით.

¹ https://pbo.parliament.ge/media/k2/attachments/Forecast_2023_Q1_-_GEO.pdf



- მომსახურებით ვაჭრობის მკვეთრი ზრდის პარალელურად, მოსალოდნელია საქონლით ვაჭრობის მნიშვნელოვანი ზრდაც.
- მთავრობის საინვესტიციო აქტივობების ზრდასთან ერთად, გაზრდილი მოხმარების და კერძო ინვესტიციების პარალელურად მოსალოდნელია, რომ მნიშვნელოვნად გაიზრდება საქონლის იმპორტის რაოდენობაც.
- გლობალური ეკონომიკის გაჯანსაღების ფონზე მოსალოდნელია, რომ გაიზრდება ექსპორტზე მოთხოვნა და შესაბამისად, გაიზრდება საქონლის ექსპორტის მოცულობაც.

აღნიშნული დაშვებების რაოდენობრივი შეფასების შედეგად მოსალოდნელია, რომ 2023 წლის მეორე კვარტალში იმპორტის მოცულობა უფრო მეტად გაიზრდება, ვიდრე ექსპორტი და წმინდა ექსპორტის კომპონენტი -0.2%-ული პუნქტით განსაზღვრავს ეკონომიკური აქტივობის ცვლილებას, ხოლო აბსორბციის (მოხმარების და ინვესტიციების ჯამი) კომპონენტი მნიშვნელოვნად გაიზრდება და მშპ-ის ცვლილებას 6.6%-ული პუნქტით განაპირობებს*. საბიუჯეტო ოფისის მიხედვით, 2023 წლის პირველი კვარტლის ეკონომიკური ზრდის შეფასებაში წმინდა ექსპორტი 0.1%-ული პუნქტით, ხოლო აბსორბციის კომპონენტი 7.1%-ული პუნქტით განისაზღვრა.



*2023 წლის II კვარტლის მშპ-ის ზრდის დეკომპოზიციის შეფასება. საბიუჯეტო ოფისის შეფასება.

დამატებითი ინფორმაცია:

[წლიური მაკროეკონომიკური პროგნოზები](#)

[განმარტება მაკროეკონომიკური პროგნოზების მოდელის შესახებ](#)